

拜

經

樓

詩

集

拜經樓詩集卷六

起己酉  
盡壬子

海寧 吳 騫 槎客

元日試筆戲效楊孟載體贈映階

二首 以下己酉

夜醉阿戎酒朝逢杜陵春  
牀頭金博山猶熾紅麒麟  
東風急送桃符曉玉律驚回梅信早  
新詩奪得造化權  
汝與山東李白好  
從來豪達士寧爲升斗謀  
不如鼓臂三千丈  
梟盧一擲崑崙邱

匣有魚腸劍難截  
赴叡蛇手有魯陽戈  
莫挽羲和車  
洪爐繡闥香風軟  
彩勝銀旛隨意剪  
勸君屠蘇須立盡  
莫待傷春愁  
晚春衣侍女熏佩馬趨天  
闈不如鼓臂三

千丈醉弄搏桑五色雲

投金瀨

漁翁歌解蘆中棹浣女碑沈瀨上秋若使個儂真望報也應江水盡含羞

聞虹橋堰落成喜而有賦寄陳映千學博張川如

少府

堰在平湖縣東庫港上通三泖予嘗勸議苟修此堰以通水利則平湖西南諸邑無

旱患至是平湖令王君恒乃修治之

巧築長虹傍絕磯連蜷勢欲走烟霏發蹤自負吾何敢  
曲突先籌或庶幾尾吸三江終古壯支聯九派一時飛

當湖有九龍港

桓寬祇解論鹽鐵豈識西門頌有歸

時有司鹽都尉借之

爲目

懷枚菴楚中

以下庚戌

吳楚春風萬里賒  
緘題欲寄重咨嗟  
漢皋游女元非女  
夢澤烟花可是花  
詞客飄零思解珮  
騷人哀怨極懷沙  
憑君早鼓湘江舵  
莫使黃陵日又斜

平江晚興

鴉軋空江斷雁過  
西風瑟瑟晚來波  
荒城一角知何處  
曾聽吳娘水調多

鏡聽詞

二首

買得菱花鏡清光比月多  
妾心長自照君意定如何

手卷詩集卷之六  
繡帶雙龍結香歛七寶裘情知少圓理懊惱不曾方

吳趨訪秦梧園

肯臺寒食後花落轉魂銷側耳聞啼鳥回頭見舞腰暖

添珠箔媚晴繫玉驄騎何處秦楊柳相思舊板橋

梧園  
工畫

尤善於柳故  
時人有此目

朱春伯孝廉寄示豐臺芍藥詩率酬三絕

璠雲低亞鳥闌紅舞裊輕攏扇底風賺得何郎回粉面  
不須怙悵說隋宮

江左聲華久絕塵彩毫吟遍鳳城春玉山筵上如相會  
元是當時咏藥人

文窗窈窕拂多羅，百斛明珠一串歌。  
假使曼殊無恙在，璿璣何處寄連波。

送胡雲士茂才入蜀 二首

飄飄遠游子，日暮情凄其。  
蒼然叩我門，執手難爲辭。  
嗟子自少長，不出桐水湄。  
茲晨夙嚴駕，逝言咏將離。  
借問今所適，非商亦非岐。  
春風萬里橋，匹馬尋所知。  
我聞蜀道難，自古誠有之。  
懸崖五丁鑿，峻坂九折危。  
盤盤連雲棧，何異蟻緣枝。  
憶當度巫峽，猿聲斷腸時。  
懷人應攬涕，觸景還賦詩。  
不見謫仙人，萬古青山祠。

荒邨寒食時，千門桃李曉。  
送君南浦上，春風何嫋嫋。

柳颺輕絲流鶯語繚遶人生獨何爲異彼枝間鳥惻惻  
或別情良辰闕幽討豈無尊中酒相與一傾倒驪駒歌  
未闕僕夫戒前道要下鹿盧劍握中和氏寶不愁去程  
遠念子年方少劔閣可題銘琴臺屹雲表何以慰相思  
書寄秋風早莫似王孫游萋萋怨芳草

朱子早朝圖

火城初撤九達紅玉殿催班夜未中多少明朝封事在  
可憐春靄隔南宮

養疴蕭寺寄魏叔子兼訂北郭觀競渡

養疴宜精藍眷茲朱陽靚翩然半庭竹小作風態整借

榻安西窗橫琴面孤嶺殘經一以窺微抱嘿自憫卅年  
湖海游素髮颯垂頰閒雲將野鶴泛此飄飄梗形骸亮  
可忘安事勞神影故人江鄉逸伊昔同所秉搗來宛精  
廬展齒蒼苔迸窮巷寡輪轍非君孰爲省屈指滄洲期  
荷衣近篷艇衝烟遲明發小駐蓬壺境黃鶴問前期昌  
陽引餘景懷沙與撒沙終古同哀郢

泉亭撒沙夫人廟爲競渡勝處

丁仙閣

古樹橫支樹危峯巧障潭雨崩穿峽路龍出定僧龕松  
吹流仙唄江光補夕嵐千秋令威跡好待鶴歸談

和應和六一泉次麗天上人韻



居士成孤往風流尚此泉雲靈羣寂靜月印萬松圓雅  
愛參寥句吟同小有天冷然誰會取魚鳥自生憐

過盧九台先生故居贈盧子應雷

石橋西畔問烟蘿竹樹蒼涼感緒多夢醒邯鄲餘馬革  
園荒湄隱話金陀崇岡尚獻寒鷗月逝水空驚落葉波  
可但尚方遺物盡茂陵玉盃竟如何思陵賜公物尤多  
今惟畱瓷盃五

賢倡巷

縣前蘇小墓巷接古賢倡草帶羅裙色溪流粉澤香  
櫛籬飄蛺蝶簷瓦落鴛鴦莫唱西陵曲當甌笑客狂

游東塔寺

追涼宜寶地，追暑借瞿曇。樹擁諸天碧，橋拖一水藍。孤墳樵尚指，半偈客同參。坐覺微言泯，鐘聲報夕嵐。

嘲智標塔

嵯嶢勢欲倚青霄，壯觀俄驚浩劫消。冷雨淒風莫相妬，也曾羣塔受他朝。

過慧樓運南堂夜話

鈿尺頻量汗簡增，朱絲長映玉壺冰。由來風雅推南仲，此日尊鱸傲季鷹。門對垂虹秋釣雪，詩催擊盜夜燒燈。我來慣倚西窗榻，細聽江城鼓未曾。

穰園尋胡茂才不值

君家茆堂角里麓碧梧翠竹手所栽短垣百折倚孤榭  
流水幾灣明釣臺屏畫猶傳吳下咏茶香無假越甌催  
欲呼菱角抱琴至一寫萬壑松風哀

和松陵集體

四首

雙聲溪上思

苦窺崎嶇坑卻憩空谿曲驅鴻怯瞰肱棄芡輕敲殼

疊韻山中吟

瀧通紅龍豐竹束綠玉蹙秋邱抽柔櫛曲瀆宿浴鵠

疊韻吳宮詞

嫵娟嫵然眠懊惱窈窕少哺烏呼姑蘇槁老遶曉沼

香廊荒亾王鄙彼委詭詬施兮隨鴟夷矢死此水矣

除夜

雞黍聒比隣魚鹽自海濱椒浮分歲饅梅破兩橋春

後舍

有大小二橋

映雪燈枝燦侵星爆竹新坐憐憔悴客猶話洛

陽塵

壽照自丁未北歸後病三載矣

過陳乾初先生墓

二首以下辛亥

晞髮風情不自憍山陰往事劫灰消相知賴有龍山月

時照吟魂度沈橋

龍山月謂月隱先生也

馬鬣平來幾度春王孫芳草恨猶新可知有道文成後

更有人間保葬人

五君詠

王光祿

鳴盛

子猷江左英志豈外邱  
叡典文陋雕組摘藻揚  
丹雘瀆落長楊才萋菲  
短轅謔咄咄日書空深  
衷應有託

錢宮詹

大昕

大雅久淪歇經訓疇  
畚斯人獨勤拳發憤羣  
賢途矻矻以窮年如飢  
得朝餽味道古有然高  
風良可模

周岑溪

春

子隱少折節讀書慕  
終古偃息南山陽畏俗  
不畏虎偶茲寸祿霑  
遂棄腰下組懿彼五溪  
人遐思少游語

朱廣靈

休度

金明老釣師矮屋蘆之碕頭白狗一官不補寒與飢雲  
羅矯孤翼巨刃摩天揮迢迢登華篇千古知者希

余翰編

集

夫君學秋駕大隱金門東脫略當世事長揖輕王公十  
年竟不調齋居掩蒿蓬夢回湖上鐘淡月開芙蓉

甘墩邨

皋亭渺峇崿數里雲微冒瀕整忽寒霽始見桃李耀桃  
李故無言脈脈若含眺回復一溪流蕭然湛春照游鱗  
靜可數片石閒誰釣際晚芳風還淡日隱蔥峭樵循斷

岸歸崖泯先時燒無因訪迷津矧此延迴棹微雨又欲  
來冥冥子規叫

蘇堤漫興

啼過黃鸝靜碧窗定香橋畔午維縷河豚不入櫻桃市  
惱得楊花亂撲缸

和范莪亭孝廉對瑞香有省元韻

弱齡奮志苦不強眼中人物何否臧歲云暮矣日過房  
早寒自昔傳寒鄉林林萬木立盡僵不死乃有蓬萊香  
蜂須蝶翅疇敢妨與雪連盟厥瑞彰玉樓妙擁千明璫  
含情不語氣自芳幽貞獨抱庸何傷桃蹊李陌徒遑遑

鮎埼亭古供相羊恍焉坐我冰壺傍傳柑按節歌激昂  
望美人兮天一方君家書塔中祕藏天一閣藏書上始結  
繩下虞黃鈔胥腕脫干兔霜玉尺頻頻汗簡量臨池已  
擅鍾元常賦筆直過呂大防轍叔有瑞香花賦我思孟博不可  
忘但祝花前長壽康

又和玉蘭初開遇雨作詩祈晴元韻

名花方靚女欲歸待未泮如何宛宛春尚限垂垂幔明  
姿罷新沐綽約懷餘慵想其幽香來拂拂不可扞豈無  
尋春屐遠出迎春岸瑞香一名迎春恍疑千白鶴翺翔紫霄半  
微雲忽蔽之顧景得無惋直恐青海龍先據雪林翰舉



頭向天末奈何輒欲喚由來蕊珠人素質不藉灌多情  
定春風寤寐釋君憲桃都雞未唱晴旭已可玩君也天  
人流憐我溝中斷三復投贈篇允矣花月旦

喜簡莊歸自燕臺

二首

素衣欣見返南邦無限相思此盡降  
啜茗使同登竹閣尋書旋爲暖芸窗  
三年馬鬣思親淚五夜丁沽聽雨樓  
不是朝來重攜手教人猶自怨香注

亂蟬聲裏數歸程忽見羌邨日脚明  
白首故人開望眼金臺詞客飲香名  
著書好續扶風志攬鏡眞憐淑媛情  
南陌東阡餘舊業與君從此學春耕

問雲樓雨望懷許甥穎上

高樓凝眺絕人羣  
雨色天光兩不分  
惆悵關山千里遠  
問雲何處是歸雲

題湘烟一曲

亦愛廬後  
新拓水軒

輕陰漠漠畫簾虛  
小閣東頭好種魚  
髣髴萬竿烟雨外  
君山一點落琴書

過新庵贈怡蓮上人

宛宛凌空見錫飛  
寥寥古刹半烟霏  
幾辭少室三花樹  
來綻中峯百納衣  
白塔山頭寒雨暝  
黃灣浦上暮潮歸  
與君坐閱東瀛變  
莫問人間萬事非

偶讀李山甫陰地關崇徽公主手痕靈石詩惜其

猶未悉公主本事因和其韻重賦一首

軍敗家亾淚未收青春掩袂別長秋  
臨關草學垂風舞  
出塞花疑比態羞  
織女機邊雲已散  
烏孫馬上曲空留  
何時此恨看消得  
除是媧皇煉始休

尋西澗草堂

劉歛臯顛劇戰場  
青山攜手與何長  
欲尋五百年朝菌  
又到荆南舊草堂

醫夢一首戲贈簡莊

周官昔紀夢夢境孔多歧  
三夢與六夢夢夢職有司  
始

我謂夢妄今知夢有之陳子昨我夢夢我宛平時自言  
病如夢要我夢爲治欣然理夢方淺深隨夢施君臣夢  
作合佐使夢驅馳寒以夢爲裘煖以夢爲絺瀉以夢爲  
豨補以夢爲芑砭用夢爲石刺假夢作錐夢藥頭瞑眩  
夢汗身淋漓夢中已霍然夢覺神益怡居然藉夢瘳不  
復置夢疑人言病非夢夢非病之醫我意夢故幻病或  
夢之機先王容獻夢占夢不我欺奈何著夢經說夢尤  
瓌奇正夢吉且安噩夢驚睟眙寤夢覺所道懼夢何嶮  
巖獨有喜夢好夢中亦解頤今君殆思夢思我夢固宜  
向使病未夢夢豈能病稽苟夢不遇病夢亦徒爾爲設

人人盡夢夢得無甚疲卽夢夢無病悵悵夢焉依從茲  
請勿夢脫夢毋我追芟芟述夢囈庶幾夢友推敢希孔  
宣父無夢歎吾衰

過茶磨山有感

何許黃門宅依樓碧水隈殘星一拳石喬木半蒿萊湖  
與高人遠糧兼野鶴催白頭前業盡怕上讀書臺

西湖花燭詞爲魏叔子禹新賦

二首

窈窕雲鬟列翠微依稀仙樂隔烟霏玉臺正欲催妝鏡  
陌上休歌緩緩歸

蓬山烟樹遠含春漱澁金樽泛玉麟賺得一雙紅燭豔

錦幃初捲魏夫人

乞巧詞

微颺嫋嫋動檐角，隔戶秋蟲催早浴。  
水精簾捲晚妝新，綠酒紅燈歡競逐。  
舉頭先拜月，如眉十二金釵次第垂。  
西園姊妹聯翩至，雪藕華瓜各鬥奇。  
卸銀甲，舒羅袖，鮫綃露浥龍涎透。  
拈鍼欲穿且未穿，銅盒蛛絲心暗叩。  
瞥顧牽牛倚畫屏，却憐銀漢坐吹笙。  
盈盈羅襪誰曾試，冉冉流光祇自驚。  
浪言烏鵲知靈匹，恐是仙家愛離隔。  
君平去後餘千秋，落冷支磯一片石。  
雲外空聞早雁翔，梧桐月轉漏初長。  
殿頭私誓人何處，蜀道歸來話斷腸。

蒙泉畫松歌

吼銀濤舞青雪支離之叟蒼髯揭上有太古雷斧皴至  
今班班痕未滅石橋南畔山崷嶸五鬣不受秦人封潺  
湲下注春流醲蒙泉飲酣乃畫松當其興躍心膽麤滿  
堂烟靄交模糊一斗險麤傾紙落大笑韋偃不丈夫經  
營擘畫各有意畫史如山盡奪氣老榦撐天天日蔽低  
枝壓面不可避鏗然屈鐵忽有聲旋看筆力破餘地誰  
家障子高崔巍繚繞寒雲堆不開軒轅臺上一翹首惟  
見碧眼胡僧坐聽萬壑清猿哀吁嗟乎蒙泉畫松非松  
格乃是三千年前不死老龍魄之而天矯涎蜿蜒怪雨

醒風不自澤被誰驅出馮夷官倒挂青冥拳霹靂豐隆  
鬱怒孰可干一朝挾上徂徠顛借問何時始放還會須  
更待三千年

秋日懷姚一如司馬從征衛藏兼寄雲士

四首

十萬貔貅共枕戈羽書千里走明駝愁腸易斷巫娥峽  
飛鳥難過察木多白草黃榆天近遠沙蟲猿鶴事如何  
最憐八口蠶叢寄眇絕陰山敕勒歌

葉滿邊關畫角驚城荒打箭路縱橫烏斯北去多禪窟  
青海西流半殺聲蛇鳥空懸巴子國烽烟終隔亞夫營  
中朝爾日非無將蛾子何緣便逞兵



赤羽琯弓歷豹韜三年從事舊儀曹  
挽輸已檄軍娘子  
調遣何煩吏石濠風雨龍鼉看日徙  
牙須虎豹漫秋噪  
白頭贏得滄江客  
數載悲歌撫益勞

尺素經年怪未通  
相思淚落夜燈紅  
固知春斷冰天外  
豈有鴻飛雪窖中  
三月因糧諸將喜  
一心報國萬夫雄  
止戈計日應非遠  
會見蒲萄入漢宮

拜經樓十銅器詩

十首

湯金既成幣頡篆亦銘戈  
不句不倨間一日三摩挲  
虞夏忽已沒誰能挽彘和

右商鳥篆戈

淒涼弩臺下萬古烟雨昏  
刃敗石稜坼鋒殫犀甲蹲  
寒風酸馬骨恐有黃父魂

右古鏃

團團古明月何來一雙鯉  
雖無陽嘉年宛有吉羊體  
錦書久不裁莫近東流洗

右漢雙魚洗

八稜含一舌清於風鈴語  
和鳴豈後鸞記里當先鼓  
顧聞宣和臣云堪節楚舞

右漢舞鏡

我有秦時鏡清光皎於雪  
不忍持照顏夜夜懷中熱  
直

待熱化鐵相思乃斷絕

右長相思鏡

幾點鷓鴣斑半爲土花蝕引吭想雛年失足防暮節滯  
彼葛陂化無乃緣爾拙

右古鳩杖

雄兔脚撲朔榮於分虎竹一朝奪臥內禍幾赤而族不  
如南山下調水意亦足

右唐銀兔符

金鈴失雷篆棲鳳飄天風星斗半磨滅塵土橫相攻憑  
君且勿棄或可諧黃鐘

右古鐸

宋鼎昔再造禮備中興初流遺七百年古器誰復圖笑  
謂姜娘子勝嫁竹鴻臚

右南宋方爐

寶劍千金裘寒芒可切玉舒之干斗牛卷之不盈握歸  
去事猿公行將以觀樂

右吳季子之劍

鐵了頭歌

鐵了頭雲間胡恪靖家老婢也公娶於新安俞氏了  
頭爲之媵兒奇寢年長而嫁不售執役彌謹又多力

善走夫人每思親輒令丫頭徒步至新安不數日得報而還其趨疾雖偉丈夫弗能追也公家故貧既貴常爲述少年事以規其家人公子嘗製錫燈檠稍華飾丫頭見之愀然言昔吾侍主猶憶歲除以泥燭檠祀先也家人肯嚴憚之其元堅若鐵羣小婢或戲以首觸之輒狂叫顛走痛旬日乃已故羣呼曰鐵丫頭鐵丫頭年九十餘猶若少壯時胡雲士茂才幼嘗見之爲予述其事

鐵丫頭力如熾健兒莫及矧婢媛首蓬脚赤裳無完老大不售甘飢寒自爲媵兮禿其鬢賣珠牽犬供晨餐主

念庭幃涕洟瀾黃耳啣書雁足傳朝發華亭暮新安況  
有行李擔爾肩飢摘黃精苗渴飲朱砂泉烟火累日絕  
四顧空茫然主今富貴身何尊雕甍甲第雄里鄜粉白  
黛黑充華軒鐵丫頭長跪請一言主昔困窮日家無僮  
石牀無氈搏泥作燈檠蠟淚長闌干今日得志幸勿忘  
其艱鐵丫頭頭似鐵鐵頭錚錚響清越觸天天柱折觸  
地地維裂直待鐵樹花開鐵鳳鳴鐵頭重長青絲莖縮  
出芙蓉新髻樣始知丫頭元是董雙成

游滄浪亭寄呈竹汀先生

先生時方主  
紫陽講席

滄浪古亭榭小鷗藏春妍清暉遠相引一水抱玦環瑯

璫寒玉林忽見白鷗天蒼栝竦巖秀丹厓俯遙鄺廓焉  
意爲豁渺若凌紫烟筠廊暫畱憩桐林旋攀緣下窺坡  
陀底不息澄陂涓奉芳志已崇攬勝俗可捐緬維古之  
人樂此誠幽偏逍遙卷阿日散誕吟朋牽投竿非羨魚  
遁世斯爲賢風月故無價寒暑俄推遷淹畱日旣夕日  
盡飛鳥還浩歌孰子和乘月弄潺湲

雅種麥行爲從女三姑賦

三姑予從兄正模次女也少端淑有至性及笄適國  
學生金邦達數載生一子一女邦達病卒三姑涕泣  
不食誓以身殉視舍後卽舉繡刀戡其喉血流被體

氣未絕家人急持之則竦身墜樓而死救之經宿始甦其父撫謂曰不有藐孤奚死爲乃稍稍視息以苦節撫遺孤及長復夭死無後乃仰天長慟曰今而後吾夫真死矣未亾人將適安歸乎遂典鬻釵瑱將挈其女間關之山左依女夫聊城尉以終焉予悲其志之苦而遇之窮也爲賦是篇

隴頭流水聲於邑陌上行人盡霑臆東飛伯趙西飛烏何如精衛填海枯憶從結髮爲君偶祇言百歲長相守荒雞忽叫噩夢回明明朗月當中剖空闔一夕魂九徂血淚化作紅珊瑚金刀剪喉喉不斷粉骨墜樓如鍊幹



忍死端因乳下子子死身今更焉倚朝來慟哭辭六親  
千里飄飄逐浪蕪生時何異路傍石死去長爲異地燐  
傷心雨打棠梨陌寒食東風芳草碧墓田一飯更何人  
付與年年雅種麥

九月二十八日同張晉樵廣文丈萬近蓬朱映辰  
二茂才邵儒佩上舍懷粹茂才錢廣伯處士次  
兒壽賜南屏重展張蒼水先生墓

鳳皇山色曉蒼蒼千載游人此斷腸猶有銀濤來自馬  
空聞玉帶殉龍驤

玉帶生文信國硯名先  
生葬時亦殉以小硯

雄心幾破霜

楓赤 特諡新頒荔子黃遙憶梅花孤嶺路祇應兩地

共爭芳

史閣部墓在揚州梅花嶺

僕三十時山陰王子爲寫逃禪圖爾來忽忽又三十年瞿曇黃面了非故吾嗔世之人且以謂形者真也圖者幻也一彈指頃形異而圖不異斯圖爲真而形爲幻矣吾又奚忍爾其真以印其幻耶行且舉斯圖歸於離墨山龍巖寺中托彼脩門空諸色相庶幾真與幻其兩忘乎竝系一

絕

猶是西來面目非歸歟何處伴禪歸龍華會上如相見  
莫笑雲山舊衲衣

酬馮爾脩茂才贈別之作

空谷何當駿足維長歌忽漫咏將離雲霄有路終期子  
徑草無媒合怨誰雪點清溪回棹夜梅開小榭獨憑時  
祇應向後相思夢長繞龍山玉樹枝

歲晏二首悼友也

歲晏鄒陽獄能教刻漏違六州真誤鑄七尺竟安歸淚  
灑空聞鶴琴彈未盡微巫陽如可召披髮下烟霏  
奄忽千秋恨摧頽百里才青蠅元不弔白馬更誰來兩  
雪漸離市妻孥郭隗臺傷心八哀咏搔首一低徊

和簡莊杭游雜詠

四首

歷歷桐陰小雪侵寥寥短劔伴孤琴扁舟重續尋詩夢  
不改江湖十載心

路遠琴臺雪乍霏空山流水思依依一坏淺土無人識

何處清風伴采薇

約尋王昭平先生墓於  
蕉石鳴琴以雨雪不果

梅花香破雨冥冥雁陣驚寒落晚汀試問湘靈何處是

遙憐隔岸數峯青

擬同訪嶗山  
人聽鼓瑟

望斷零丁海上塵雞碑天半屹嶙峋疊山遲死文山早

青史何曾負此人

時同人爲張忠烈公  
勒碑墓道簡莊書丹

陶山明府仿古造茗壺以貽好事

五首

洞靈巖口龙精材百編臨樨傍釣臺傳出河濱千古意

大家俯首莫驚猜

金沙泉畔金沙寺白足禪僧去不還此日蜀岡千萬穴

別傳薪火祀眉山

東坡先生祠在蜀山之巔

百和剛砂百鍊陶印牀深鎖篆烟消奇觚不數宣和譜

石鼎聯吟任尉繚

陶山嘗夢尉繚了事四字因以自號茗壺亦鍛此印

翛然琴鶴致清虛金注烏能瓦注如玉鑑亭邊人吏散

一甌春露一牀書

陶泓已拜竹鴻臚玉女釵頭日未晡多謝東坡老居士

如今調水要新符

坡翁調水符事在鳳翔玉女洞舊宜興縣志移於玉女潭辨詳桃溪客語

拜經樓詩集卷六終

拜經樓詩集卷七

起癸丑  
盡乙卯

海寧 吳 騫 槎客

題金華女史倪仁吉凝香閣遺彙陳映千學博所

藏

二首  
以下癸丑

風格霜筠鬥雪姿  
家隣瑤草傍金芝  
祇教乞與靈芸手  
繡出傷心幼婦詞

春蘭秋菊各含芬  
畫意詩情總絕倫  
攜向鷗波亭上看  
也應娣視管夫人

得孫漫述

繡褌桃符欲鬥紅  
白頭聊復慰途窮  
門前賀歲賓仍在

甕裏燒春酒未空說餅旋開湯餅會挑燈閒數試燈風  
庭梅似亦知人意儘弄寒香撲醉翁

張聲雷茂才遺照仲婦請題

二首

瓊枝何意早零霜冷落琴書事可傷莫怪披圖裁識面  
當年弱女尚扶牀

落落孤松韻獨標詩成如聽欲歸潮風流驃騎今何在  
草沒城南第五橋

雨中登東湖弄珠樓

二首

層闌縱目亦雄哉晝靄空濛杳未開湖勢欲浮烟塔去  
客帆多載雨聲來銀絲翠網鋪新畫黃浦蒼濤捲疾雷

安得玉壺春滿泛醉看神女弄珠回  
面倚峻岑背古濠九龍杯底合風濤一從詞客歌黃鶴  
遂有仙人醉碧桃熟食又催烟火冷春星莫繫斗牛牢  
人間俯仰成今昔欲去低個首重搔

題映千學博扶護日記

三首

五羊城郭浮雲裏想見征鞍欲卸時買得枕椰何處醉  
夜臺風雨泣連枝

瓊臺嶺外木千章不是逍遙舊日堂我亦人間同病客

一回展卷一摧腸

先兄以辛亥春下世

選勝南園舊事耽天涯幾度合朋簪可人最是潘懷縣



風誼居然到脫驂

訓毅堂  
中翰

許文木過晚宜軒小飲卽送之五茸

長年尤惜別每別神爲沮之子元度流花外棹屢舉旣  
去還復來知我久延佇絺衣帶蘿徑桐帽尋棕塢問子  
適何來春申舊時浦千里涉驚湍扁舟狎鷗侶演澆桐  
溪流伊昔釣游處畱連詎能忘日夕自容與我家菰蘆  
中老屋枕溪澗琴書空委籍花竹半廊廡坐失東隅期  
安望桑榆補觴行君勿辭晚意亦有取青蓮發華池妙  
語使一吐雖非河朔期庶以滌殘暑

殘暑散林塘餘暉淡將夕沙頭宿鳥還溪上露花白疎

桐亦知時暗引將離席  
踟躕遲明發橫雲深卜宅去去

計誠良茲焉謝塵役得句碧雲外  
坐來湯休客謂投誠上人

曾鯨醉高士圖

二首 崇正辛未作程尚題青蓮句云我醉欲眠君且去明朝有意

抱琴來簡 莊所藏

西齋微雨含簷篋美人攜畫錦作帽  
亟屏寒具祛煩囂使我一見飲興豪  
借問伊誰拂吳綃波臣妙解丹青包  
紀年猶是思陵朝百五十秋浩劫消  
螟蛉螺贏適相遭姓氏莫辨劉與陶  
安知爾汝非神交一人嶽欻韻尤饒  
葛巾半帶糟邱糟眼花落井氣如潮  
口角流涎語啾啾一人抱琴虎步超  
回頭卻顧風飄翛分明無功同激醪

睡鄉有路思獨迷。麾之不去矧可招。知音自古難其曹。  
與來奚必須明朝。請君更彈醉翁操。

人生百歲同風狂。有酒不醉仰屋梁。不見古來賢達士。  
往往相與託此鄉。泉明本自晉之逸。致與竹林無異匹。  
弗忍神州遂陸沈。昏昏日以酒送日。醉兮卽向中山眠。  
覺來又是崇正年。欲歌太平琴。無絃南柯庶以全。其天  
吁嗟乎。會郎當日寧無見。回首滄桑驚世變。願君什襲  
醉士圖。付與千秋醒眼看。

南塘竹枝詞

四首

海上新腔久不翻。南塘竹枝多斷魂。儂家白苧邨邊住。

夜夜烏啼直到門

春風水閣雨連天猶記郎來夜泊船  
妾夢不隨春雨散  
郎船今繫阿誰邊

日日東風帶石尤聲聲腸斷古鹽州  
淚珠寄與雙龍水  
送過麒麟堰始休

秦皇美人葬山顛未見君王三十年  
何如卜築比肩里  
朝朝自唱想夫憐

得朗齋涕寧寄懷詩卽酬兼柬黃小松司馬

三首

寂寂經時掩薜蘿悠悠離抱比如何  
秋燈剪處書重讀  
春韭調餘酒尚醅上客多才如玉海  
主人有力挽天河

樓船第一籌時策好繼西風白雁歌

岷峨萬里到滄溟我亦移家幾世經

水經注沔水源于蜀岷迤邐而東南

合谷水迤邐官縣故城南東至散浦入海按散浦即今澱浦子家自白岳移居小桐溪去散浦甚近海國

舊傳都尉治桐溪猶憶客星停一從分手楊枝綠幾負

重湖酒幔青何日天涯還舊雨無窮情話待歸舫

語古幽期訪古蹤幾多勝事合游從金絲舊壁懷先典

玉簡新泥洗漢封歷下亭邊名士會崎嶇城外水犀鋒

遐思庾亮南樓月每到秋來意轉濃

送朱春山進士宰閩中

美人捧檄驂文驂春明回首

君思覃都門祖帳麗晨

旭碧芙蓉紅蓼搖花菴於時蘆溝秋正闊一行南下空趨  
趨鄉園到日衰復戒行輶征蓋飄風飈殷勤顧我老且  
病秋餘燕子淒同龕晚菘可剪盍小憩抵掌雄辯驚雕  
談自言趨庭道孔邇赤城游戲仙鳧愁

時尊甫渥齋方  
任天台學博

承歡樂事孰逾此萊衣晝錦香醞禪固知玉程速郵傳  
早有父老壺漿擔塞帷想見下車始長風漠漠沙吹潭  
炎荒作吏良不易輔以儒術夫何慙士元要非百里器  
武城亦許絃歌耽更從暇日恣搜討狀補草木追稻舍  
福州荔子味獨絕紅塵久罷馳都籃武夷粟粒亦時貢  
前丁後蔡爭籠探致君堯舜固有術養以口體夫何堪

茲邦矧復數殷富再熟稷稻八熟蠶駢羅細瑣到海滋  
魚蝦蜃蛤蝸蠡蚶鰲峯日暖耀貝闕鮫客夜泣傾珠函  
自從橫海熄烽埃杭梯重驛泉輪男君家世本清白吏  
洗瓊會酌廉泉甘樂哉斯民得斯宰召父杜母何妨三  
政成期月報

天子尺蹠寄我先花南

徐夫人白描大士陳丈汝豐屬題

拙政園邊野草春平泉花木半爲薪  
巫咸未剪遼陽紙  
辛苦鷗波懺佛人

文木自吳中來小飲山館卽席有詩次荅

二首

千里雲山繫別腸，眼明驚喜見真長。詩懷玉樹龍蔥色。

座挹芝蘭奕葉光，藏叡有園尋縹緲。

縹緲樓在洞庭王氏叡舟園采

香無徑感蒼涼，卻憐丁卯橋頭月。依舊歸來話未央。

滿天梅雨是蘇州。

王仲甫句

那有芳春尚舊頭，一夜清溪成

穩泛半千佳句足，風流橫雲卜宅君。終得下澤勞薪我未休，稍待秋風鱸膾好抽帆，還覓季鷹游。

### 撒沙夫人廟

何年南宋畱遺廟，又過西湖競渡天。寂歷空山春雨後，數聲幽鳥學神絃。

### 秋思

二首



碧玉釵翹掩鬢蟬紫蘿花畔晚風前憑君莫話崔微事  
祇此相看已黯然

耿耿星河拂曙流水紋珍簟欲涼秋開軒自放麻姑蝶  
不遣飛隣燕子樓

荆南歲暮柬香南 二首

行役芳歲晏棲息投礪阿空山厲嚴寒惻惻冰霜多重  
雲結高林逝水無回波緬茲國岳陰媿人隔烟蘿抗懷  
夙所期白日屢蹉跎迢迢清商曲重爲勞者歌龜勉遵  
前業時俗多所呵惟彼金石契謂我志不磨奈何曠容  
微荏苒羲與娥衣帶緩疇昔鄉園異伐柯引領春物妍

遲子一來過

萬鍾非所求寸心良有託悠悠山水緣致豈異邱壑結  
交義始敦縞紵不爲薄憶與故人期共矢歲寒約投好  
在六經微言互根索滔滔百家流非不浩且博君才煥  
羣雅卽事多蹉踣高談性命餘恢宏霸王略旦暮觀古  
今鐘鼎視藜藿瀕行贈畫稿冰雪懷中落燕宛及良時  
勸我常斟酌卽今石亭邊何似孤山脚君家孝侯里折  
節故自若平生倚疎放懿此雲中鶴安得晨風翰相與

翔寥廓

贈刻石武林陳生兼呈梁元穎太史

陳生倣儻面如玉負藝不讓黃仙鶴  
昆吾日剗翠雲窩玉屑霏微懷神落  
一波一磔三委意蠶尾銀鉤廉不剗  
瘦硬寧惟規晉唐莽蒼直欲追漢魏  
晴窗暖日烘香蠟翠墨輕摩恣響塌  
澄心堂紙巧匠裱寶過神龍第一匣  
方今書品擅梁侯碑版照耀三千秋  
尚書已復懸素帳中令輒欲前驂驅  
想從逸少傳字勢正變離奇盡其致  
矯如滄溟擘金翅妙比芳筵舞劒器  
西臺少肉爾胡然巨山簪花吾敢議  
山陰道士朝來訪便寫黃庭充供養  
折釵屋漏紛多狀臥虎跳龍元相向  
亦有懸針垂露痕祇恐傳刻微失真  
世惟陳生妙解之如北海遇伏靈芝

卽看流傳諸劇跡千里不遺毫釐差頃爲先人寫遺碣

丹毫欲奪皋魚血封題寄我秋正中百斛驅珠爛明月

爾時思就陳生語病骨牀頭苦撐拄中郎妙筆玉川文

一日摩挲幾斷魂

抱經學士爲先子  
誤墓碣太史書丹我聞陳生女弟號

芳姿畫眉不解學兄爲頻年淪落鴛湖側嘗鏤幽蘭寄

所思

陳生女弟芳靜亦善  
刻石嫁橋李某氏

自來靈秀天所鍾亦有噓拂

荷鉅公左家香茗謝家韞至今兄妹爭趨雄梁侯落筆

走天下斯人名氏將誰亞肯爲重泉慰棘人尤憐淒斷

王脩社誓言力致青瑤璞更倩陳生細礪斲莫待他年

遼海歸莓苔螭首空生粟

登吳毓春東湖寓樓 二首

弄珠樓外水空濛，日暮寒潮九派通。  
一繫扁舟孤樹下，幾疑身在玉壺中。

桃花樓閣幾重烟，占斷城南尺五天。  
何處最宜舒倦目，綠楊新雨溼鞦韆。

三月三日涉園脩禊，以舊藏楊忠愍公與鄭端簡  
手書真蹟歸鄭子羹和卽席呈諸同志 三首

黃門遺跡城南陌，綠玉漪漪水四圍。  
上已襟懷宜勝賞，名園草木借光輝。  
也知人似山陰好，何必珠非合浦歸。  
歷歷烏臺徵舊事，鈐山冰雪更霑衣。

椒房初地閱朝晡蘭渚新開曲水圖

涉園相傳晉章穆何皇后故宅按史

后以穆帝升平元年丁巳冊立去蘭亭脩袂僅五載耳

百里風煙通遠望三春桃

李接平蕪柳眉尚學張京兆鳥語如呼鄭鷓鴣此日瀛洲遺老盡翻憐清景近蓬壺

丙史風流慕金谷昭陵繭紙逐飛蓬春來旭塢天仍朗雨過桃源絮亦紅遠嶠難回秦帝轍清談宛洽晉人風他年欲問萋宏血祇在荒園獨寤中

小疋屬題其外祖張蕤菴遺照

二首

浮玉山前草又新披圖欣見古遺民遂巡欲下青州拜祇爲陽元我故人

竹翠松蒼晚色兼歸雲何處雨廉纖想他五字吟成後  
不覺瑤囊糝帽簷

松靄大令謂予涉園脩禊記頗似戴剡源戲酬四  
韻

自古文章有畛蹊春工裁出剪刀齊漫教剡曲方烏夜  
猶道蘭亭慕銑谿觴咏怡情箋乍擘管絃合座鳥爭啼  
回頭笑問周公瑾頓效東家可似西

讀尉繚子寄陶山明府

王風委蔓草六藉胥埃塵縱橫百家流異說馳紛綸陰  
符祖穰苴鬼谷傳儀秦七雄一龍戰四海無逃鱗伏尸

兩蝸角流血川爲堙威弧孰能弦黎首聲徒吞吾觀尉  
繚子舌上馳風雲抵掌惠王前游說天官陳當其運獨  
智謂可前鬼神背水號絕紀向坂則廢軍百萬實我累  
何由命令伸苟能殺其半薄海威士振斯言甚申商無  
乃慘不仁後人循謬說覆轍當誰任所以秦項輩旋亦  
殞厥身大梁昔開國濟濟多賢實王者不嗜殺敬以沃  
嗣君卓哉孟子言庶幾醇乎醇

題女史蔣南蘋設色花卉

三首

彩筆輕分翠黛螺芝田館外暗香多謝家空有人哦絮  
那見凌波試襪羅



初日芙蓉並蒂開春蘭秋菊可憐才分明一段徐熙意  
繡出針神薛夜來

腕底春風妙剪裁江南紅豆幾花開憐渠自守羅浮夢  
不漏芳心到野梅

畫中四時花卉獨不及梅

寄懷查南廬

二首

南國眞名士西園雅集才投壺逢玉女挾策上吳臺螢  
火秋無際寒蕪晚未開蕭蕭班馬路何日復歸來  
淹留仍旅食蕭戚感芳辰綠慘金堤柳紅銷玉蕊塵龍  
頭終國器雞口尚才人杜牧前身是誰爲載酒頻

題楊傅九茂才西湖秋柳詞後

四首

玉露凋傷玉樹歌赤闌橋外幾經過盈盈怕見秋波綠  
曾爲驚鴻照影多

一種風情兩愴懷飄零金粉暮雲指竹枝唱了楊枝續  
欲喚君爲小鏡厓

半倚樓臺半夕陽低迷如恨舞山香流鶯不共韶光住  
爲恐西風沒主張

碧樹雕闌換水天長條管盡兩湖烟前塵尚記芳園角  
小立東風試紙鸞

過金牛洞

欲尋埋骨所重至會骸間竹嫩烘茶日雲滃浴鵝灣觀

棊樵未至洗盃袖初還獨有皋蘇廟千秋對海關

長河道中示映堦

涼風消暑靄篷艇載秋聲荷靜香初浥魚跳鷺未驚  
緩歌歸浣女曲檻聚流螢茲夕修川路真成載酒行

登萬蒼山

叢林偏蒼峭石骨露巒岈杖策一長嘯秋風颯已寒  
龍歸湖闌閉雲漲海壘寬荷鍾從吾志天成白玉棺

宋槩分類唐歌詩爲嚴久能茂才作

唐分類歌詩一百卷南宋祕閣修撰趙孟奎文耀所  
編自敘謂與雪林子李龔同輯凡古今體詩四萬餘

首作者千三百餘家其網羅可云富矣書刊於咸淳  
中流傳絕少昔毛子晉有殘本至子斧季屬其戚嚴  
拱侯之武進唐氏借抄逆旅爲盜所誣至涉訟庭探  
沸油而終不能全一時傳爲好書口實具詳斧季之  
跋斧季沒後此書流落吳中予曾見之雖吉光片羽  
而古香醜醜極可愛玩近烏程嚴君久能以善價得  
之并屬題詩卷後

南渡王孫耽韻事矻矻老作書中蟬古風未及兩漢代  
近集先自三唐探撐腸拄腹四萬首家千三百五十三  
部居州次各門類爬羅一一珠搜領大而山川包六合

細至草木蟲魚蚶如入建章宮殿千門復萬戶坐令洞  
心駭目四顧爲迷愍年湮世遠知者少咸淳舊槩散若  
風吹嵐零圭碎壁剩餘幾有時流落琴川南毛公志古  
甚厥考少原有婦求其簪巧偷豪奪詎足怪燖湯請浴  
驚魂燿誰言痛定更思痛譬食諫果終回甘我昔吳游  
曾瞥覩牙籤觸手香醪禪至今時復縈夢寐指動不異  
貪夫貪豈知展轉歸我友數有前定疇能參君家屨屨  
饒祕帙張魏經術齊趨趨宋刻張洽春秋傳魏了翁儀禮要義久能竝以善直購之  
汲古遺編歸有託渭城彷彿歌何截此本毛氏後歸蔣  
蔣借衰遲愧我都廢學懶散不異三眠蠶往往見獵尚

校

心喜如失柳下思魯男何當抽帆逕蒼雪歸雲共給梅

花菴

文耀葬李冀事

道場山巔峴山麓石臼桴飲窪尊身醉來

便喚雪林子瑤囊細嚼前塵談斯時參橫月落萬籟聽  
俱寂舉頭應見一泓天水遙拖藍

初秋泛舟鷺毛里

竹日隱霏微迎舠紛綠霧藤蘿古岸邊迤邐芳塍布一  
泓破野色數里脩蛇注斷血絕還連回橋妨更渡農家  
遠作勞盡室南畝務驅犢疎柳陰提壺饌盃去啞啞林  
間聲嗚咽冰底語棹舉得微涼正急灑鷗雨推篷荷珠  
滴欹枕蘋風度流雲滃未歸何處溪鐘暮

寄友人蜀中書後漫題一絕

酒肆琴臺路幾重久無魚素到蠶叢故人若問年來事  
盡在桐陰小牖中

聽彈琵琶

鷓鴣腸斷四絃微幾斛蒲桃買一揮彈出聲聲渾不似  
莫教回首問明妃

題倪文貞張忠烈二公遺跡便面

裴亭孝廉藏

滔滔越江東忠義夙所萃何年遺兩筵什襲鎮瑤笥故  
人千里書要我共題字抱卷未竟窺詎敢輒軒輕緊惟  
倪先生逍遙託游藝水清石見底涉筆露高致援手思

攬芳襟袖颯流翠難遮西日塵空負沈淵計涼風扇六合滿把蒼梧淚載咏司馬篇澄懷渺孤寄想當江上役  
烽火驛遞置舉杯酌明月浪湧江心寺玉笛忽飛來中  
宵成不寐了知南征苦未卜東風利金戈不挽日碧血  
終塗地地下兩英魄執手應歔歔當時假竝生王業豈  
中墜徒教文謝間先後從人議忠烈詩云疊山遲死文  
山早青史千秋任是非  
千秋撫陳跡瞥若鳥展翥風流范孟博嗜古愈嗜味幽  
居鮎埼亭不數江珧貴持此慰調飢肯同秋篋棄超遙  
感子懷目斷寒江駛衣沈閣上雲文貞有闕  
名衣雲日墮峯頭  
荔忠烈墓在  
荔子峯下微雨暮蕭條冬青亦顛顛誰將清祕藏重



補西臺記

簡莊冬讀書圖

夫君何日不讀書讀書寧盡於冬日偶思趙衰亦可愛  
遂倩長康縱奇筆雙虬奮鬣交倔強之而怒奪鬼斧出  
百城南面萬卷擁于思孰似髯之逸復陶覆體絮滅溫  
風帽掉頭冠不稊紛紛俗學識者寡斂手但云賈島佛  
憶自秦人有九有欲愚黔首捐儒術冬不種松乃種瓜  
偶語盡伏詩書鎖炎劉諸老功不細屋壁山巖悉鉤緝  
簡編零落在口雪竇螢窗幾鷓蟀曲臺之記后氏傳  
聖普踵與均入室三無五起雖可疑漢制羸文容併黜

君也意取其八篇

文王世子

不廢三餘逃凜冽上窮邱索及

墳典貫串疏通如比櫛時乎心忽忽相會冰霰霑襟坐  
忘拂嗟余學殖落苦晚蒿目昏逾漆燈漆豈無炳燭藉  
餘照開卷輒思難處乙南榮負暄銷酸寒北垞探梅遣  
愁疾偶占驢背一篇詩笑比遺經挂繭栗

喜陸雲裘處士見過

以下乙卯

南郭春陽未盡融西園已占試燈風梅經門雪鱗鱗白  
酒爲留人澹澹紅四海交游雙短鬢百年文史一雕蟲  
多君甫里閒吟日卻笑浮生自轉蓬

梅花和松霑大令

三首

裁見疎枝破臘前天涯芳訊漫經年倚來官閣春如海  
吟到羅浮句亦仙雲外風微牽鶴夢牀頭夜靜拂琴絃  
須知可冠羣芳首直爲中含鼎味全

脈脈無言似有言不隨紅紫門塵喧瑤姬顧影終傾國  
玉蝶分香併斷魂芳草斜陽孤樹驛淡烟新月薄寒邨  
料應不少攜筇客恰恰尋來酒正溫

相思空自限清芬月地雲堦杳未聞少女回時風宛宛  
江婁立處水沄沄寄將隴表知何日忽到窗前賴有君  
更喜交情容冷淡任教松竹與平分

題唐陶山明府玉鑑亭

使君合守花中縣亭子還疑鏡裏居半壁孤雲蟠檻峻  
千峰倒影入潭虛渡河已去噪山虎施食還來縱鯽魚  
他日荆南頌遺愛任臺杜榭好同書

明錢塘李子陽少宰遺卷

二首 齋  
孫贊華藏

當時著作擅雄才鷓鴣爭誇御李回爲問洗兒筵上客  
幾人真見寧馨來

銅官山下一班荆江館重來隔死生看取孤兒遺卷在  
敢將高誼比玉成

贊華沒後其子  
宇暉以卷屬題

湖上感舊

閒游無緒且閒吟望裏青山感概深芳草未諳歸馬意

玉樓猶軫問琴心  
乾坤納納江湖遠  
歲月堂堂齒髮侵  
貰酒白沙堤畔路  
勾留聊爲竹間禽

春柳和查梅史 三首

何處輕盈識翠翹  
秦淮春染一條條  
珠簾玉樹剛三月  
暮雨朝烟便六朝  
最是勾留如意舞  
若爲吹暖賣餠簫  
銷魂剩有臺城伎  
欲仗邱遲爲我招

不須鶯燕語惺忪  
無限韶光悵望中  
自昔嬌歌徵北里  
何時弱絮嫁東風  
雕鞍一繫絲猶短  
錦纜徐牽浪欲空  
莫怪年年依板渚  
新烟低處有隋宮

禁烟風雨一番經  
玉笛悠揚乍可聽  
倦眼難分醒睡態

折痕偏近短長亭鳳州有客思攜手鶴市何人喚踏青  
聞說桃花春夢裏幾回爲爾惜娉婷

梅史有桃花影  
傳奇爲時所稱

陶山明府善卷行春圖

二首

屐齒蒼苔徧嶺雲探奇每自先

去聲

同羣祇今父老猶能

說手拓東吳翠碣文

玉鑑高懸百尺臺銅峯正對懸樓開誰知讀畫亭中客  
曾是仙巖撲蝶來

時縣齋西新構亭于  
池上予爲名曰玉鑑

臨津寒食

萋萋芳草又天涯側側輕寒帶柳斜絳蠟無人傳漢燭  
青郊有婦泣桃花愁中寄跡籠鶯館夢裏鄉園社燕家

身世百年懷底事祝陵春酒剩堪賒

三月三日同萬瑱爲徐穎賢史間如過蔣聲依湛

瀆山莊脩禊

斯辰浴令序惠風颺清川出郭未十里花柳漸已繁同  
心二三子超遙遶牽攀前瞻脩林盡湍流迅漩還契彼  
山水音奚假筦與絃絲雨俄東來薄靄浮荆巒弭檝遵  
枉渚遂款幽人關山中醞初熟花下席屢遷觴流滌煩  
襟霽景亦以褰曠望碧天際杳渺無涯觀爲復憶年時  
樂數辟疆園去歲在海鹽同人脩禊涉園極文酒之樂于今忽淹泊湔裳涉  
蛟淵慷慨千里思疇能測其端浮生信物役彭殤詎通

詮俯仰已陳跡在昔不云然眷茲筭頽侶誓言追古歡  
苟微懇款辭中情何由宣

祝陵

茅茨依山隈野約臨溪曲渡頭一宵雨遂有沙棠宿紫  
燕遠交飛緋桃睡初足荒陵人不歸芳草年年綠

朋溪

已拜石爲丈更招溪作朋秋延綠橘芳春引紅桃蒸激  
濁復揚清風波終不興如聞參龍子於此遇孫登孫觀  
董令升作  
朋溪記

吳門月下漫成短歌



闔閭城頭一片月溶溶澆澆開蒼壁推篷有客良久看  
水面飛來何處笛笛聲嘹唳月相和倚棹微聞水調歌  
清光想見未虧夕賺得夷光醉舞多舞低樓上人初倦  
乘醉還教開別館侍女爭誇鬥草贏水犀莫問餘艤戰  
銅溝玉檻春風裏宛轉蛾眉嬌未起悠然何處賣餠簫  
市上英雄吾老矣越甲東來竟不聞始蘇麋鹿忽爲羣  
屬鏤叫斷胥江月衣錦旋歸甬上雲空宮只自說荒王  
千載章明夢一場烟雨難銷金虎氣管絃如恨綺羅香  
君不見真娘墓頭草新綠齊女門邊山削玉綠野淒涼  
宰相園蕊珠零落金臺曲家國由來共一悲英雄兒女

各何之明朝擬折昌亭柳重和梅邨寄遠詩

陶山明府既爲予題桐陰小牘復賦妾入門樂府  
見贈率酬三絕

閒心都付白雲鄉忍爲楊枝說斷腸贏得屯田新樂府  
花前重按小秦王

驪珠何處諗龍眠樓下橫波晚拍天弄玉不歸紅豆老  
江南愁煞李龜年

暇整琴書出翠幃來時元是去時眉樓高白雪吾何敢  
且免羅裙典蔡姬

同馮爾脩鮑選堂兩茂才游拙政園效梅邨體

大宏寺裏鯨音散拙政園中烟景變姹女丹砂何處燒  
寶珠已失連枝爛我來恰直黃楊閨屐齒蒼苔晚交印  
攜手城陰步履遲香鬟不整春雲鬢憶昔繁華一夢中  
烏衣甲第藹相通雕闌釵砌崇奢麗直接吳王避暑宮  
行人多讓青驄馬御史威名盛吳下浪子俄將博進償  
玉臺藏得千妖冶海上歸來又築堂趙明誠家有歸來堂平泉風  
月任平章詞成卻遜閩中麗賦就其如鬢上霜當年姑  
姪名雙擅小淑風流隨長倩獨傷宦海逐驚濤飄零晚  
作遼陽燕盧家休問鬱金香石氏惟餘玳瑁梁壞壁蚶  
蜃悲蟋蟀瑣窗鸚鵡笑鴛鴦劫灰不到西林路豪兒健

卒更番據一曲蛾眉一曲房銷魂幾被孽蕪誤

園中有曲房乃

柳如是所策

自從簿錄到官家妝閣平教馬糞遮空學驢鳴

依畫檻尤憐玉珮拂霜花玉門關外風蕭蕭烏綠江波  
春不綠七年清淚滴邊笳萬里歸魂生馬角馬角邊笳  
限玉關銅駝荆棘愴時艱金釵每以懷人卜漆髮多因  
哭女斑馬上朝來逢驛使殊恩見說環真賜

陳直方有女名環蓋

取賜環之意詳梅村亾女厝誌

骨肉相看半死生山邱華屋知誰記季

重舊游渾散盡山陽隣笛增凄緊歌館翻成繡佛場勳  
名併入黃梁枕花落花開轉瞬間春風啼鳥自懸蠻空  
餘千古江南賦不見重來庾子山

上已後一日集陶山明府玉鑑亭同胡滄門王夢

澤胥燕亭卽席

玉鑑如霞遠建標蘭臺人聚可憐宵管絃正過重三節  
裙屐何慚典午朝不分催歸惟杜宇猶疑好事近藍橋  
湘簾樺燭低何處莫問山城刻漏遙

時陶山爲滄門納姬迤軒

同燕亭過迤軒再調滄門

二首

羸女吹簫晚未休迤軒聊借作秦樓明年樂府從君唱  
十六生兒字阿侯

鶴氅閒披伴翠翹王郎風韻故超超佳人若問蒼浪髮  
祇道山陰雪未消

三月六日陶山明府招同人集周氏園賞杜鵑兼

脩禊事

江南春近櫻桃院滿地楊花落如霰幾度流杯曲水辰  
又驚天女催歸燕大令風流似牧之心娘呼出故遲遲  
應緣白髮須料理故遣花枝照酒卮滿堂賓客皆流矚  
蒨袂蠻鞞紅躑躅人影花光兩未分風前占斷闌干角  
闌干十二烟繚繞色映千枝萬枝好幾度將飛又不飛  
幽庭認作瓊華島試問春從何處回珠簾繡幙待君開  
勾留仙蝶梁山伯惱亂針神薛夜來祇爲天成元沒骨  
春工柴出猩猩血夢裏猶驚五夜風簷前無奈三更月

爲誰辛苦剪吳綃小朶輕盈掩鬢翹翻手撿雲覆手舞  
歌成不讓董嬌嬈賺得懷中珠一串燈前微露桃花面  
檀板金尊莫更催花心客思同繚亂就中尚有士無雙  
謂燕閒倚瓊鞋賭翠缸湔祓金人潛奉劍投壺玉女笑  
窺窗主人意重難爲別嬰武低斟浮絳雪西蜀方消望  
帝魂東湖又諾朝雲責君不見離羣橋畔草離離爲爾  
低徊欲去遲紅豆能拋旖旎態牡丹須及豔陽時又不  
見鶴林寺裏芳華茁頃刻安排疎復密始知好事說亭  
亭何必神仙非七七

贈燕亭大令

二首

四十不稱意儒冠非誤身若爲陽羨里猶有解龜人詩  
卷陶佳月鶯花悵遠春故園汾上水迸入客愁新  
攜手城南路春陰寒食時舟從溪女喚心許杜蘅知岳  
雨喧風小林英渡水遲晚來思買醉又過斬蛟祠

食鱠戲呈梅史

食梅常苦酸食鱠常苦刺口腹無窮期造物有餘愧江  
鄉霉始迎趙趙風奄至誰以千絲網障彼清流汭白龍  
困豫且矧爾銀鱗細豪家正相待歌筵中筵沸一尾十  
千餘窮閭半年計猶言無下箸狼籍輿與隸我得因其  
間詎曰人所棄招邀數朋儕料量稱鹽豉解聽吳娘烹



堯學宋嫂製金奩映璪盃玉鱗浮釜翠渾疑鳥闌驛初  
試江東膾既非侯船儔夫豈丙穴類玉珧形徒忝婢妾  
冗堪鄙庶幾西施乳未斷嬌兒睡霑喉滑且柔喚醒夢  
猶嚙平生泥清尊濡首飲文字要令素心洽奚必紅裙  
醉君看暴鮓帖遠壓衆經笥微吟發嘲弄聊續加恩志

初夏過沈莊

二首

漱澗湖波漲鴨頭裙腰草綠雨初收醉茶軒裏饒茶夢  
不到蘇家舊舞樓

黃妃塔外水雲隈鷓鴣聲中萬綠回喚卻春歸猶自可  
莫教風雨送愁來

兩陳髯行

兩陳髯者一爲同里簡莊

鑑

一爲陽羨春浦

經

昔陳

其年嘗合邵子湘賦兩髯行王漁洋復題其後爲世所稱道今予交二子又皆同姓爲尤奇因戲仿之作

兩陳髯行

平生結交兩陳髯一居規北一荆南風流儻慕各嫵媚  
超前絕後何參覃北髯彘彘緣坡竹勁可挂弓紫如玉  
疾風遙度疑有聲半嶺松濤吹謾謾南髯瘦頰縈春蚓  
碧眼于思勢連鬢仰天大笑一掀餘長袖恒遭鬚帛引  
天下無如二子奇魁瓌磊落復嶽嶽皇墳倉雅各淹貫

八索九邱能讀之，卻怪頻年意蕭索。金臺白下多飄泊，  
市中擊筑酒人稀。月下啼烏秋葉落，伯樂不來神駿窮。  
世間馬耳射東風，三千碧淀鷗頻狎。十二紅樓夢詎通，  
湖海元龍銷意氣。賦成總爲依劉計，鏡裏蛾眉祇自憐。  
不知時世崇高髻，男兒須學萬人敵。似我栖栖何所得，  
瀟西烟雨海東雲。欲往從之無羽翼，武烈王孫故絕倫。  
法生家世亦嶙峋，他年誰作雙虬傳。此日天涯一故人，  
烟雨樓納涼卽事。

露荷香裏暑初逃，炭業危磯倚釣鰲。島樹平連三塔遠，  
湖樓迥出衆星高。何來畫舫蜻蜓尾，訴盡鷓鴣絃邏迢。槽

悵悵曲終人不見  
一鉤新月挂空壕

銷夏偶成

寫得蕉蘭染案香  
綠陰遮卻研蟾光  
呼童整備西窗雨  
不道行雲欲送涼

秋日游隅園

落日古城陰  
幽尋豁素襟  
鶴鳴依磻靜  
松色向亭深  
碧隴仍金粟  
紅泉自玉琴  
悠然濠上意  
不爲羨魚心

秋閨

金井梧桐露下頻  
玉階蟲語訴悲辛  
低徊欲問簾前月  
可有沙場未臥人

哭抱經學士二首

吳山捉袂重丁寧小別誰知判死生服鳥有妖傷賈傅

蛇年無計引康成藏山事業真三代

馬宛斯作釋史人稱爲馬三代學士

登第時榜姓馬

脫手丹鉛尚百城我是西州門下客何時馬策

恨方平

八十那教賦遠游暮雲江樹悵悠悠祇今夢斷陪京路

何日書歸故國樓雨雪銘旌千里凍關河涕淚一生休

空看篋裏盟言在肝膽輪囷照九秋

今秋學士寄書有誓言與夫子永結

爲弟昆之語

映堦小照

吾家亞白耽韻事年登三十不稱意人言斯道能窮人  
欲驅其魔魔轉至相馬失肥士失瘦姑布孫陽時不又  
白也飄零甫也愁夜郎飯顆同昏晝豈無凌烟與麴閣  
幾許丹青圖衛霍男兒未際風雲會莫怪芒鞋雙脚縛  
卽今薄海靖烟霏萬里樓船何處歸吟罷還思一投筆  
悄然獨立風吹衣

哭莪亭孝廉

二首

消息傳來恐未真萬回初致八行新

從萬玉倉得赴

聲吞夜雨

挑燈客魂斷春風剪紙人白首未甘消壯氣青雲常爲

惜窮鱗

長男壽照與君同丙午榜  
久嬰目眚每爲之惋歎

鄞江路隔錢江闊一

勸何由絮酒陳

七十年華遽釋難

君六十九歲著釋難一篇見寄

幾回開篋淚沈瀾座

凝荀令香猶在鶴駕王喬樂未闌

彌留之際聞異香滿室音樂隱隱不絕

一代書名江左重兩朝文獻浙東完

君書法得晉人意家有一天一閣藏書

自明迄今未散

郭碑遠託吾何有瀧表他年會早刊

嗣君肖甫以君墓誌

屬見

冬晚過陶山松陵官舍卽席兼寄荆南舊游

幾度魚書訊久要天涯離緒劇魂銷獨披東海千峯雪

來問吳江第四橋衣上酒痕還杜宇窗前梅影忽瓊瑤

分明一噫吳生

宰

畫祇欠亭亭醉舞邀

題宋蘭城茂才聞川棹歌

三首

劍歎臺前冷夕曛六朝宮體散如雲

蔣石林有明宮佳詞百首傳于世

名卻愛聞川好花月新聞續舊聞

輕雲如畫柳如烟新月盈盈映一川彷彿眉邊鴻案在

相看祇有孟光賢

蘭城室戴氏亦工詩

至元曾覽嘉禾志滿目蒼涼古戰場此日射襄城下路  
名花偏倚宋家牆

拜經樓詩集卷七終